



Aningaasanut inatsimmi konto pingaarneq 64.01.05 naapertorlugu inuussutissarsiutitigut nunaqarfinnut isorliunerusunullu siuarsaanermik tapiissutinik suliassap ulloq 1. januar 2020 aallarnerfigalugu Namminersorlutik Oqartussanit kommuninut nuunneqarnissaanik, apeqqutillu tassunga attuumassuteqartup 2019-p ingerlanerani kommuninik ataatsimoortumik tapiissutinik isumaqatiginninniarnermut ilanngunneqarnissaanik Naalakkersuisut peqquneqarnissaat pillugu Inatsisartuni aalajangiiffigisassatut siunnersuut.

(Inatsisartunut ilaasortaq Aqqaluaq B. Egede, Inuit Ataqtigiit)
(Siullermeerneqanera)

Demokraatiniit oqaatiguarparput pingaarluinnartoq aningaasaliissutit atorineqartassasut sumiiffinni siuariartornissamut periarfissalinnut aamma inuutissarsiornikkut periarfissarissaartunut.

Pissutigaarput sapinngisamik amerlanerpaat iminnut ilaquuttaminnullu pilersuisinnaangornissaat. Allatut oqaatigalugu, iluaqutaanngilaq aningaasaliissutit sumut tamaannga erfagiunneqartassappata isumaqanngitsumik assigiimmik atungaqartitserusunneq pillugu. Nunattami immikkoortuini assigiinngitsuni periarfissat assigiillat. Taamaattumik politikerit uagut aalajangersinnaangilarput aalisakkat aalajangersimasut imartatsinni sorlermiissanersut tamannalu pissutigalugu sumiiffinni assigiinngitsuni inuutissarsiornikkut periarfissat assigiinngitsuujuartussaapput.

Taamatut eqqarsartarneq pigiliuttariaqparput inuutissarsiutitigut periarfissat eqqartussatillugit.

Taamatulli oqareerluta pingaaruteqarpoq eqqarsaatiguarartassagatsigu, nuna tamakkerlugu qanoq ineriartortitsisinnaanerluta. Periarfissat ersinngitsuusaarsinnaapput aamma minnerunngitsumik nunatsinni isumassarsiarpassuupput. Tamannalu tunngavigalugu pingaaruteqarpoq Aningaasanut Inatsit aqutigalugu suliniutit tulluurtut tapersersortarnissaat. Ilaatigut tamanna ullumikkut pisarpoq Konto pingaarneq 64.01.05 aqutigalugu. Demokraatini konto taanna nuannareqarput aamma isumaqarpugut atussallugu eqqortuusooq.

Manna siunnersuut atorlugu IA-p aningaasat kommuninut nuunniarpaat, partiilli oqaatiginngilaa tamanna qanoq pissanersoq aamma qanoq agguasoqassanersoq. Ilisimaneqareersinnaangilarmi isumassarsiat pitsaasut sumi pinngorumaarnersoq. Taamaattumik tamanut pitsaanerpaasussavaoq Inatsisartuni aningaasat Aningaasanut Inatsimmiittut pigiinnarutsigit.

Demokraatini nunaqarfinni isorliunerusunilu inuutissarsiutinik siuarsaanissaq kissaatigaarput tamannalu pitsaanerpaamik pissaaq Aningaasanut Inatsimmi konto pingaarnerup pigiinnarneratigut - aningaasat kommuninut nuunneqarnissaat atornagu.



Tamanna tunngavigalugu siunnersuutip itigartinneqarnissaa inassutigaarput.